

“Urubyiruko rw’u Rwanda rukwiye kwigishwa politiki n’imiyoborere kugira ngo rwitegure inshingano z’ubuyobozi , gusigasira ibyagezweho no guteza imbere u Rwanda”

Ibi ni ibyagarutswe mu nama nyunguranabitekerezo k’uruhare rw’urubyiruko mu miyoborere y’u Rwanda: gusigasira ibyagezweho n’uburyo byaramba.

Tariki ya 03 Gashyantare 2023, Ihuriro ry’Igihugu Nyunguranabitekerezo ry’Imitwe ya Politiki ryateguye Inama nyunguranabitekerezo k’Uruhare rw’urubyiruko mu miyoborere y’u Rwanda: gusigasira ibyagezweho n’uburyo byaramba.



Iyi nama yahuje abantu banyuranye barimo: abayobozi mu Nzego za Leta, Abayobozi b’Imitwe ya Politiki iri mu Ihuriro, abashakashatsi, urubyiruko, abanyamadini, n’abandi. Inama yabereye muri Lemigo Hotel iri mu Mujyi wa Kigali, yitabirwa n’abantu 180.



Mu ijambo ry'ikaze, Umunyamabanga Nshingwabikorwa w'Ihuriro, **Bwana GISAGARA Theoneste**, yibukije ko iyi nama isanzwe iba buri myaka ibiri, ariko kubera ibihe byo guhangana n'icyorezo cya Covid 19, Ihuriro ritabashije kuyitegura mu myaka ibiri ishize. Yavuze ko icyifuzo cy'Ihuriro ari uko iyi nama yaganira ku buryo bwimbitse ku nyigisho za politiki zikwiye guhabwa urubyiruko rw'u Rwanda, kugira ngo rurusheho kumva uruhare rwarwo mu miyoborere y'u Rwanda, rugasobanukirwa uburemere bw'inshingano zo kuyobora, rukazitegura, kandi rugaharanira ko ibyagezweho byakomeza gutera imbere, uwo murage ukazaramba igihe kirekire. Yasoje asaba urubyiruko rwatumiwe gukurikira neza ibiganiro, rukaganira n'inararibonye muri politiki y'u Rwanda (abayobozi n'ababyeyi) bakabaha impanuro zibafasha gukomeza kwitegura no kwitabira kujya mu bikorwa bya politiki ari nako bitegura kuba abayobozi beza, bazira ikintu icyo ari cyo cyose kiganisha kuri politiki mbi yashenye u Rwanda.



Mu ijambo ritangiza inama, Umuvugizi w'Ihuriro, **Depite UWANYIRIGIRA Gloriose**, yashimiye abayitabiriye yibutsa ibyaganiriweho mu nama zabanje, avuga ko umwihariko w'inama y'uyu mwaka wa 2023 ari ukuganira k' **Uruhare rw'urubyiruko mu miyoborere y'u Rwanda: gusigasira ibyagezweho n'uburyo byaramba**. Yavuze ko iyi nama igamije ibi bikurikira:

- Kugaragaza uko urubyiruko rwa mbere y'ubukoloni rwategurwaga mu rwego rwa politiki, inyigisho rwahabwaga, n'amasomo twakuramo tubona yagira akamaro no muri iki gihe, kugira ngo

uwo murage tuwubakireho;

- Kugaragaza ibibazo urubyiruko (rw'u Rwanda) ruhura nabyo birubuza kwitabira no kugira uruhare rugaragara mu miyoborere y'Igihugu, impamvu zitera ibyo bibazo, n'amahirwe ahari yafasha urwo rubyiruko kubirenga;
- Gutekereza ku nyigisho za politiki zikwiye guhabwa urubyiruko, hashingiwe ku cyerekezo politiki cy'u Rwanda, kugira ngo urubyiruko rurusheho gusobanukirwa uruhare rwarwo mu miyoborere y'u Rwanda, rusigasire ibigenda bigerwaho, kubiteza imbere no gutuma biramba.

Ibiganiro byo muri nama, byibanze ku mitegurire y'urubyiruko rw'u Rwanda kuva mu gihe cya cyera, harebwa inyigisho zahabwaga urwo rubyiruko. Inama kandi yaganiriye ku bibazo byugariye urwo rubyiruko birubuza kugira uruhare no kwitabira kujya mu bikorwa bya politiki n'igikwiye

gukorwa. Ikindi inama yaganiriyeho ni inyigisho za politiki zikwiye guhabwa urwo rubyiruko kugira ngo rurushaho kwitegura kuzayobora u Rwanda, gusigasira ibyagezweho n'uburyo byaramba. Inama kandi yatanze inama ku buryo Ishuri ry'Ihuri ryigisha politiki n'imiyoborere (Youth



Political Leadership Academy / YPLA) ryanza inyigisho riha urubyiruko rwo mu Mitwe ya Politiki.

Nyuma y'ibiganiro, hatanzwe ibitekerezo bigari bikurikira:

1. **Gukomeza kwigisha urubyiruko rw'u Rwanda indangagaciro zo gukunda Igihugu, kukirinda, no kugiteza imbere, kandi byose bigakorana umutima w'ubwitange n'ikinyabupfura (discipline)** kuko ari byo byaranze zimwe mu ntware z'u Rwanda, haba mbere y'ubukoloni haba no mu rugamba rwo kubohora u Rwanda;
2. **Kongera imbaraga mu masomo y'uburere mboneragihugu, uruhare rw'ababyeyi mu burerere bw'abana rugakomeza kurushaho kumvikana mu miryango;** ubwo burere bukuzuzwa n'ubumenyi bahabwa mu mashuri kandi **itangazamakuru** rikabigiramo uruhare mu kurushaho kubisobanura, hakoreshejwe uburyo bworohera urubyiruko (Social Media n'ibindi);
3. **Gushyira imbaraga mu kwigisha urubyiruko ibirebana na politiki n'imiyoborere,** rugasobanukirwa politiki icyo ari cyo n'akamaro kayo, rugakura rwumva ko politiki ari ubuzima bw'Igihugu ko ari yo itanga icyerekerwa (**Vision**) kigari cy'aho Igihugu cyifuza kugera mu gihe kirekire, ko kandi nta bandi bazatuma ibyo bigerwaho uretse rwo, kuko ari bo mbaraga z'Igihugu, **rukaba umusemburo w'impinduramatwara;**
4. **Gutegura ibiganiro byajya bihuza abakuru n'urubyiruko** (cyane cyane abanyapolitiki, abayobozi mu nzego zinyuranye) bakaganira ku rugendo rwabo mu buzima bwa politiki kuva bakiri bato, kugeza aho bageze. Bakagira urubyiruko inama z'uburyo bakwiye

kwitwara no kwitegura inshingano zo kuyobora no guteza imbere abo bayobora (**Debates and mentorship sessions**). Urubyiruko rukagira abo rwigiraho (Role Models) b'inyangamugayo;

5. **Leta ikwiye gutekereza ku buryo abajya mu myanya y'ubuyobozi bajya babanza guhabwa inyigisho z'ibanze zirebana na politiki n'imiyoborere** kugira ngo bibafashe gusobanukirwa umurongo n'Icyerekezo cy'Igihugu, bumve uburemere bw'inshingano bahawe, n'uburyo bazitwaramo neza ku nyungu rusange z'Igihugu, **bagakorera Abanyarwanda kandi bakabaha serivisi nziza;**
6. **Guhuza ba rwiyezimirimo biteje imbere mu rwego rw'ubukungu, bakaganira n'urubyiruko kugira ngo babashishikarize gukora, kwihangira umurimo, cyane cyane uburyo bakoresha ikoranabuhanga mu bikorwa bibabyarira inyungu, bakivana mu bukene;**
7. **Gukomeza gushyigikira ishuri ry'Ihuriro ryigisha Politiki n'imiyoborere (Youth Political Leadership Academy / YPLA),** kugira ngo rikomeze gufasha Imitwe ya Politiki n'Igihugu muri rusange gutegura abayobozi bazayobora Imitwe ya Politiki n'Igihugu, basobanukiwe Icyerekezo cy'u Rwanda kandi bazakomeza guteza imbere demokarasi ishingiyeye ku bitekerezo bya politiki binyuranye, bishyira imbere ubwumvikane, ubworohereye n'Ubumwe bw'Igihugu.